

# LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch

## L'aua da Laax che cuora e squetra

A Laax dat ei pli ch'in tozzel fontaunas. Sper ils siat begls historics da 1895 dat ei era fontaunas novas. Il «jet d'eau» el Lag Grond squetra dapi 1992 mintga stad e la fontauna avon il center communal ei dapi 1996 sin quei plaz. La novissima fontauna da Laax ei in bloc da nummulits che porscha aua da beiber a pign e grond. (fmr/abc) **Pagina 5**



FOTO AUGUSTIN BEHL



# Bischels da Coray, Indermaur ed Aubry

Ils begls-fontauna els vitgs s'audan tier la cultura locala. Aschia era a Laax. Per l'entschatta dalla stad han la vischnaunca politica e la fundaziun Pro Laax schau tschentar ina fontauna nova denter Lag Grond e casa da scola Grava. Igl ei ina speciala. L'aua cuora ord in crap da nummulits dad ina tonna.

AUGUSTIN BEELI/FMR

L'aua da beiber ei gl'element pli impurtont dil carstgaun. Ni aur ni autras rizezias san remplazzar ella. En quei connex ha Laax in privilegi: Il num dalla vischnaunca – silmeins il num romontsch – renda attent a quel. Lags deva ei quater a Laax: Lag Grond, Lag digl Oberst, Lag Sec, Lag Tiert. Vitier aunc palius e dutgs, e gl'ual dalla Val Fraissen, gl'ual dalla Val Buglina e quel dalla Val Draus. Daper tut neschevan fontaunas, l'aua serimnava els lags e curreva vinavon tras fessas e sfendaglias sutterranas. Pervia da numerus foss da baghegiar e cun sviar e canalisar las auas, ein pliras aveinas sespiarsas. Tuttina dat ei aunc avunda aua a Laax e la vischnaunca fa tut ils sforzs da tgirar quei bein custeivel.

## Las siat fontaunas historicas

«En quei liug muncava gia adina in begl-fontauna. Ils affons che termagliavan ella vischionza, ni era affons da scola, mavan savens ella tualetta publica per beiber aua frestga dalla spina», raquenta *Marita Buchli*. Ella ei buca la suletta che haveva observau e constatata quei. Entadem il Lag Grond muncava a hospis ed indigens ina fontauna. El coc da Laax dat ei perencunter siat talas, e quei dapi 1895. Quellas haveva il capitani papal Peter Coray (1843–1930) schau installar sco part essenziala dil provediment d'aua dalla vischnaunca. Mintga fontauna ha in begl da buentar ed in da lavar. Da gliez temps era Laax in vitget da purs cun 280 habitonts. Tuttas casas eran baghegiadas per liung la via. Quella s'extendeva da Demvitg tochen sil Crest, Seehof e Streia. Oz ei Laax ina vischnaunca cun 2200 habitonts e quartiers spatitschai.

## Nummulits da 40 milliuns onns

Aunc adina ein ils begls cuagl element schi custeivel beinvigni. Oz surveschan els buca pli alla biestga ed allas lavunzas, mobein a numerus viandonts, ciclistas e passants. L'aua cuora ord il tgiern sco quei ch'ella fa dapi gleiti 130 onns. Cuort avon che sortir dalla suprastanza communal ha *Marita Buchli* sligiau il problem d'ina fontauna che muncava enta Grava. La fin da zercladur ha ella saviu inaugurar siu pli davos project. Cun sustegn dalla fundaziun Pro Laax ha ella procurau ch'ins monteschi ina fontauna nova sper il kiosk, en in liug fetg frequentau d'affons da scola, turists ed indigens. Da quella cuora aua frestga da beiber, in e scadin astga sesurviv direct ni emplenir la butteglia.



Marita Buchli cul sculptur Christian Aubry ed il president dalla Pro Laax, Erwin Ardüser (dretg).

FOTOS AUGUSTIN BEELI

«La fontauna survescha a biars ed ei enta peis a negin.»

Marita Buchli, anteriura suprastonta dalla vischnaunca da Laax

«Ella survescha a biars ed ei enta peis a negin», manegia l'antieriura geraua. Ensem cun il president dalla Pro Laax, *Erwin Ardüser*, ha ella collaudau dacuort la fontauna nova. Igl ei in'ovra dil sculptur ed artist *Christian Aubry* da Sevgein. La fontauna nova ha negin begl, ella survescha propi ad in scopo: beiber aua frestga

ni emplenir la butteglia. «La fontauna consista d'in bloc da nummulits e peisa rodund ina tonna», declara il president dalla Pro Laax. La fundaziun ha finanziau il pign project cun grond effect e nez. L'aua cuora buca giu d'in tgiern ni bischel, ella para da sburflar direct ord il crap. Il grond bloc cun mellis conchiglias petrificadas d'avon 40 milliuns onns ha il sculptur priu ord la Val da Pigniu. Dalla vart d'Andiast traversa in'aveina cun tals nummulits la cuntrada entuorn il Pèz d'Artgas.

## La fontauna da Lavanuz

La fontauna nova da nummulits entadem il Lag Grond ei dil reminent ina da pliras specialas ch'ei dat a Laax, sper ils begls historicas da 1895. Ina da quellas ei a Lavanuz, silla senda entuorn gl'ual dil Cuolm Liung. Igl ei denton ina fontauna privata. Igl advocat da Turitg *Peter Nobel* ha schau construir ella avon prest 30 onns gl'artist *Robert Indermaur* sper sia casa da vacanzas. Igl ei in grond begl che envida cunzun affons da siglir ell'aua. La petga-fontauna ei ina legra figura da bronz d'in um cun in baviel satel en bucca che squetra l'aua el begl.





**La fontauna da Robert Indermaur a Lavanuz ei privata.**



**Ina dallas siat fontaunas historicas da Laax.**